

## الفرصة الذهبية (2)

قابلت أحد أصدقائي من اللي بعث لهم ملف "الفرصة الذهبية" على الواتس. فقال لي الكلام اللي بعته جميل جداً ويدي أمل، لكن عندي تساؤلات كثير. فأنت عارف أني بعيد عن ربنا من فترة طويلة ومصلتش ولا أقرت في الانجيل من سنين، وأمور زي الأفلام الإباحية والعادات الشبائية بقيت إدمان، فتفتكر هايكون فيه أمل في واحد زي إنه لو تاب ومات دلوقتي إنه ممكن يروح السماء؟

قلت: المسيح قبل اللص على الصليب ووعدته بالفردوس، فأنت مهما كانت خطاياك ما أظنش إنها توصل لخطايا اللص اليمين وحتى لو وصلت، فزي ما المسيح قبله ووعدته بالفردوس -لما تاب- هايقبلك ويوعدك أنت كمان بالفردوس.

قال: طيب عندي سؤال تاني. اللص تاب ومات، لكن أنا ممكن أتوب وما أموتش بعد التوبة على طول، وبعد كدا لو سقطت في خطية ومت، كدا تفكر هاروح فين؟

قلت: الصراحة أنت كدا محتاج تروح لأبي الروحي وهو هايجاوبك على كل أسئلتك.

قال: أب روحي!! أنا أروح لأب روحي بالمنظر دا!! شعر طويل وبنظلون مقطع، ووشم على إيدي، أفكر لو الأب الروحي شافني مش هايسلم عليّ أصلاً؟

قلت: اطمئن. هو حد مختلف ومش بتهمه كل الحاجات دي، دا على العكس هايرحب بيك أكثر ما هايرحب بي. فكل اللي بيهمه إنك يكون عندك استعداد تسمعه. اتشجع وخذ قرار، دي فرصة ذهبية أنك تبدأ مع ربنا ما تأجلش. تعالى جرب وشوف مش هاتخسر حاجة!!

قال: هاجي على سبيل التجربة لو ما عجبنيش مش هاكمل.

قلت: تعالى جرب لو ما عجبش ماتكملش.

وفعلا رحنا لأبي وقابلناه. رحبّ بينا.  
وعرّفته على صديقي وعرف أن عنده  
تساؤلات. واستأذنت وسبتهم مع بعض.  
وبعدها صديقي قال لي اللي حصل:  
في البداية صدمني ترحابه وقبوله لي بالرغم  
من منظر لبسي وشعري، فأنا مش متعود إن  
حد متدين يرحب بي كدا، دا أقل حاجة لازم  
يعلق على شعري أو لبسي. ويقول "ليه شعرك  
طويل كدا" أو "ليه بنطلونك متقطع".  
والصراحة دا ريحني كثير. وشجعني إني أتكلم  
وقلت له: عندي شوية أسئلة ممكن تكون  
غريبة شوية؟

قال: خذ راحتك يا ابني.

قلت: أنا مش زى صديقي ولي فترة  
مارحتش كنيسة وفترة أكثر ما صلّيتش. مش  
بس كدا الصراحة أنا مُدمن للأفلام الإباحية  
والعادة الشبائية. ولما قرّيت نبذة "الفرصة  
الذهبية" اتشجعت وقلت لنفسني "لسه فيه  
أمل". بعد ما كنت بأقول "كدا كدا جهنم!!  
بكورنا جهنم، من غير كورنا جهنم!!". فهل  
فعلاً فيه أمل في واحد زىّ إنه يتوب؟

قال (بهدوء ومحبة): مع المسيح فيه كل الأمل وكل الرجاء. ومهما كانت خطاياك فدم المسيح يبطهر من كل خطية (1يو1: 7). يعني يخليك طاهر تماماً. فمكتوب "إن كانت خطاياكم كالقرمز تبيض كالثلج، إن كانت حمراء كالودودي تصير كالصوف" (اش1: 18). فالمسيح اللي قبِل اللص اليمين، وقبِل المرأة اللي أمسكت في ذات الفعل، وقبِل مريم المصرية اللي عاشت سنين طويلة في النجاسة والخطية، لسه زى ما هو ماتغيرش. فمكتوب "لأني أنا الرب لا أتغير فأنتم يا بني يعقوب لم تفنوا" (ملا3: 6). وكل اللي بيجيله بيقبله مهما كانت خطاياها ويدي له غفران كامل ويخليه طاهر تماماً وكمان يديه الوعد بالأبدية السعيدة. (يو6: 47). هي دي المسيحية.

قلت: وهل الموضوع بالسهولة دي يا أبي، فأنا عشت وقت طويل في الخطية وأدمنت الأمور الإباحية لسنين-ومازلت!! فهل لما أتوب هاتتغفر كل حاجة وكمان ها يكون لي الحياة الأبدية؟

قال: دا مش كلامى يا ابنى دا كلام الكتاب المقدس فمكتوب "توبوا فتمحى خطاياكم" (أع2: 19). وزى ما شوفنا المسيح قبل ناس كتير ومارفضش حد بسبب إن خطاياهم كانت كتير أو إنه جاله متأخر. فيه قول جميل للقديس يوحنا سابا بيقول "التوبة هي التي تجعل الزناة بتولين". فشفت لما الواحد يتوب ويرجع للمسيح إيه اللي هياحصل.

قلت: طيب سؤال تانى. اللص تاب ومات على طول، لكن أنا ممكن أتوب وما أموتش على طول زيه. وممكن أعيش وفى اليوم اللي أسقط فى الخطية أموت، كدا هاروح فين؟

قال: الموضوع مش كدا يا ابنى ابدأ!! هو أنت تفكر إن أقدم قديس يقدر حتى ولو فى آخر يوم أو حتى آخر ساعة فى حياته أنه يقول "أنا فى هذا اليوم بلا خطية".

قلت: أظن ما حدش يقدر يقول كدا!  
قال: طيب وبالمنطق دا، تفكر حد هاروح للسماء؟

قلت: كدا ها تبقى السما فاضية مش  
هايكون فيها غير الملايكة. كدا كلنا  
هانضيع!!

قال: فالمهم هو أنك ترفض الخطية وتجاهد  
ضدها ولو سقطت تقوم بسرعة وتقول "لا  
تشمتي بي يا عدوتي إن سقطت  
سأقوم" (مي 7: 8). فالجندي اللي بيحارب  
في المعركة لو انجرح فالقائد هايعالجه، ولو مات  
هايكرمه كشهيد. ودا اللي هايعمله معاك ربنا  
بالظبط. زى ما قال القديس مار اسحق  
السرياني "لتمت في جهادك أفضل من أن  
تعيش في كسلك فإن الذين يموتون وهم  
يحاولون حفظ الوصايا هم شهداء مثل الذين  
يموتون من أجل الايمان بالمسيح". فطالما أنك  
رفضت الخطية وتجاهد ضدها فلو مت في  
أي وقت فالله هايكرمك وهايكون لك  
أكاليل الشهداء.

قلت: إيه الجمال دا يا أبى. طالما بارفض  
الخطية واجاهد ضدها أكون زى الشهداء.  
حاجة حلوة قوى. طيب فيه سؤال تانى. هل  
كل الخطايا اللي عملتها من ساعة ما تولدت

لحد دلوقتي، بمجرد إني أتوب عنها هاتتغفر  
كلها؟

قال: بالتأكيد يا ابني. هو أنت تفتكر إن  
الله هايغفر شوية ويسيب شوية!!! فتأكد  
إنك بمجرد أنك تتوب هاتبقى طاهر أبيض  
كالثلج وتتمحى كل خطية، كل مش بعض  
أو أكثرية لكن كل خطية (1يو1: 7).

قلت: كلام مشجع يا أبي. لكن أنا  
الصراحة مافكرتش في التوبة إلا بسبب  
الخوف من الوباء ومن الموت، فهل كدا الله  
هايقبلني؟

قال: ربنا مستنيك من زمان يا ابني. ربنا  
مشتاق إنك ترجع له وما هايصدق إنك  
ترجع<sup>1</sup>. أنت وحشته جداً، دي فرصة ذهبية  
مش بس ليك دا كمان لربنا.

قلت: فرصة ذهبية لي دي معروفة إني  
أتوب وما أروحش جهنم، لكن إزاي فرصة  
ذهبية لربنا!!!

---

<sup>1</sup> قل لهم حي أنا يقول السيد الرب إني لا أسر بموت الشرير  
بل بأن يرجع الشرير عن طريقه ويحيا ارجعوا ارجعوا  
عن طرقكم الرديئة فلماذا تموتون يا بيت اسرائيل (حز 33:  
11).

قال: أصل أنت ما تعرفش قيمتك قدام ربنا، أنت ابنه. ابنه الغالى والمعزز عنده(اشع 43: 4). في المسيحية الله أب حنين مش سيد متعالى، في المسيحية الله قريب مننا مش مجرد إله بعيد عننا، فإنك ترجع دا يوم فرح بالنسبة له، أنك تسبب إبليس وتبعد عن طريق جهنم وتبدأ في طريق الملكوت دا يوم فرح لربنا-أبوك السماوى- ولكل السماء، فمش مهم السبب اللى هاترجع بسببه، لكن المهم إنك ترجع لأحضان المسيح وتثق في إنه هايقبلك ويغفر لك كل خطاياك، أوعى تشك ابدأ في قبوله أو غفرانه الكامل ليك. فالابن الضال رجع بسبب إنه مالقيش أكل وكان هايموت من الجوع. ولما رجع أبوه قبله وهو فرحان، ومسألهموش عن سبب رجوعه أو وبخه على أي خطية عملها. بل فرح بيه واحتضنه. فالله هايحتضنك ويفرح بك جداً أكثر من 99 بار لا يحتاجون للتوبة(لو 15: 7).

قلت: والإدمان اللى أنا فيه دا حله إيه؟ أنا هأتوب دلوقتى وهأصدق إن الله هايغفر

لى كل خطية ولو مت هاروح الأبدية، لكن هل بعد التوبة هأتحرر من الإدمان؟

قال: الحياة الروحية حياة وأنت بدأتها بالتوبة. الحرية طريق وأنت بدأت أول خطوة فيه وهى رفضك للماضى وثقتك فى قبول المسيح لك وإنك بقيت ابن للسماء مش ابن جهنم. المرات الجاية هانكمل إزاي تصلى؟ وإزاي تقرأ فى الكتاب المقدس؟ وإزاي نتحرر من العادات؟

قلت: طيب ما فيش تدريب اعمله لحد ما نتقابل؟

قال: فيه تدربيين. أول تدريب إنك كل يوم الصبح تصلى وتكلم ربنا وممكن تتقول كلام زى كدا "يارب أنا غلبان. عاوز أعيش معاك. احمينى من الشر والخطية لوحدى مش هاقدر ابدا. ادينى ثقة انك قبلتني وغفرت لى كل خطية. ادينى ثقة ان لى السماء مش جهنم. خلىنى احبك من كل قلبى. علمنى امشى فى طريقك واكون معاك دايمًا. ماتخلىنيش اضيع الفرصة الذهبية دى منى. ففعلا فرصة ذهبية انى اتوب وانى أكون

معاك بعد سنين طويلة من البعد. فرصة ذهبية انى امشى في طريق الملكوت وانى ابعد عن طريق جهنم. بس محتاج مساعدتك وقوتك لوحدى مش هاقدر انا ابنك وماليش غيرك يارب يسوع. أمين". فابدأ وكلم ربنا في كل وقت وأنت قاعد وأنت ماشى وأنت نائم، كلمه بساطة الأطفال واتاكد إنه بيسمعك.

تانى تدريب إنك تسمع أربع حلقات أو تقرأ نبذات "سر قوة الشباب". لحد ما نتقابل المرة الجاية.

والمرات الجاية هانكمل بنعمة ربنا.

\*\*صديقنا لو عندك أي استفسار أو سؤال يمكنك مراسلتنا على:  
[godlovehostel@gmail.com](mailto:godlovehostel@gmail.com)

للحصول على باقى

المجموعة PDF

من خلال هذا الموقع

[mbade2.com](http://mbade2.com)





أو لسماع الأجزاء  
مسجلة بشكل درامي

[Soundcloud.com/mbade2](https://soundcloud.com/mbade2)